

# AKASHVANI(AIR)

## RNU: KOLKATA

### Bengali Text Bulletin

26-05-2026

Time: 1.40 PM

#### বিশেষ বিশেষ খবরঃ-

১) মুখ্যমন্ত্রী শুভেন্দু অধিকারী আজ কল্যাণীতে নদীয়া, উত্তর ২৪ পরগনা ও হুগলী জেলার আধিকারিকদের সঙ্গে এক প্রশাসনিক বৈঠকে মিলিত হয়েছেন।

২) সল্টলেকের দত্তাবাদে স্বর্ণ ব্যবসায়ী স্বপ্ন কামিল্যা খুনে অভিযুক্ত রাজগঞ্জের প্রাক্তন বিডিও প্রশান্ত বর্মণ গ্রেফতার।

৩) দক্ষিণ কলকাতার একটি বে-সরকারী স্কুলের এক পড়ুয়ার মৃত্যুকে কেন্দ্র করে পথ অবরোধ ও বিক্ষোভের জেরে এলাকায় তীব্র উত্তেজনার সৃষ্টি হয়েছে।

৪) বিদ্রোহী কবি কাজী নজরুল ইসলামের ১২৮-তম জন্মজয়ন্তী যথাযোগ্য মর্যাদায় উদযাপিত হচ্ছে।

৫) দক্ষিণবঙ্গের বিভিন্ন জেলায় আগামীকাল থেকে বৃষ্টির পরিমাণ বাড়বে বলে আলিপুর আবহাওয়া দফতর জানিয়েছে।

০০০০০০০০০০০০০০০০

নদিয়ার কল্যাণীতে আজ প্রশাসনিক বৈঠকে যোগ দিয়েছেন মুখ্যমন্ত্রী শুভেন্দু অধিকারী। কল্যাণী বিশ্ববিদ্যালয়ের APJ আবুল কালাম আজাদ অডিটোরিয়াম সংলগ্ন মাঠে এসে পৌঁছালে

তাঁকে পুলিশের পক্ষ থেকে গার্ড অফ আনার দেওয়া হয়। বৈঠকে নদিয়া, উত্তর ২৪ পরগনা ও হুগলী জেলার জেলাশাসক, মহকুমা শাসক, বিডিও, জনপ্রতিনিধি, সাংসদ ও বিধায়করা ছাড়াও তিন জেলার পুলিশ সুপার-সহ একাধিক পদস্থ পুলিশ আধিকারিকও আছেন। এঁরা ছাড়াও উপস্থিত আছেন কেন্দ্রীয় মন্ত্রী শান্তনু ঠাকুর রাজ্যের মন্ত্রী দিলীপ ঘোষ অগ্নিমিত্রা পাল তৃণমূল কংগ্রেসের সাংসদ কাকলী ঘোষ দস্তিদার।

নদিয়া থেকে আমাদের জেলাপ্রতিনিধি অনুপম মোদকের প্রতিবেদন -

০০০০০০০০০০০০০০০০

মুখ্যমন্ত্রী শুভেন্দু অধিকারীর ‘জনতার দরবারে’, তাঁদের সমস্যার কথা জানাতে পেরে সন্তোষ প্রকাশ করেছেন, ২০১৭ সালের রাজ্য গ্রুপ-ডি ওয়েটিং মঞ্চ, ২০০৯ সালের দক্ষিণ ২৪ পরগণা প্রাথমিক শিক্ষক পদপ্রার্থী মঞ্চ এবং পশ্চিমবঙ্গ NSOF শিক্ষক পরিবার সংগঠনের সদস্যরা। সংগঠগুলির ঐক্য মঞ্চের আহ্বায়ক আশিস খামরোই জানান, বিগত তৃণমূল কংগ্রেস সরকারের দুর্নীতি ও বঞ্চনার জন্য এক হাজার ৩৫১ দিন ধর্না কর্মসূচীর পর নতুন সরকারের নতুন মুখ্যমন্ত্রীর সঙ্গে সাক্ষাতের সুযোগ পাওয়া গেলো। তাঁদের সমস্যার দ্রুত সমাধান হবে বলে তাঁরা আশা প্রকাশ করেন।

০০০০০০০০০০০০০০০০

ঐতিহ্যশালী বিশ্ব ভারতী বিশ্ববিদ্যালয় কর্তৃপক্ষ মেডিকেল কলেজ ও হাসপাতাল গড়ে তোলার জন্য কেন্দ্রীয় সরকারের দ্বারস্থ হয়েছে। এইমসের ধাঁচে এই হাসপাতাল গড়ে তুলতে তাঁরা আগ্রহী বলে জানিয়েছেন, বিশ্ববিদ্যালয়ের জনসংযোগ আধিকারিক অতিগ ঘোষ। তিনি জানান, এই হাসপাতালটি গড়ে উঠলে এলাকার মানুষ উপকৃত হবেন।

০০০০০০০০০০০০০০০০

সল্টলেকের দত্তাবাদে স্বর্ণ ব্যবসায়ী স্বপন কামিল্যার খুনে অভিযুক্ত রাজগঞ্জের প্রাক্তন বিডিও প্রশান্ত বর্মণকে, পুলিশ গ্রেপ্তার করেছে। এর আগে সুপ্রিম কোর্ট তাকে আত্মসমর্পনের নির্দেশ দিলেও তিনি সেই নির্দেশ উপেক্ষা করেন।

গতরাতে নিউ টাউনের ইকোপার্ক থানা এলাকায় গাড়ী নিয়ে যাওয়ার সময় এক পথচারীকে ধাক্কা মারেন তিনি। ঘটনায় ওই পথচারী ছাড়াও, এক স্কুটি চালক’ও সামান্য আহত হন। পুলিশ

জানিয়েছে, মত্ত অবস্থায় গাড়ি চালাচ্ছিলেন প্রশান্ত বর্মণ। এরপরই পুলিশ রাজগঞ্জের প্রান্তন বিডিও-কে মোটর ভেইকেলস্ অ্যাঙ্কে আটক করে। পরে তাকে গ্রেফতার করা হয়। আজ তাকে বারাসাত আদালতে তোলা হবে।

উল্লেখ্য, গত বছর ২৯শে অক্টোবর যাত্রাগাছির খালধার থেকে স্বর্ণব্যবসায়ী স্বপন কামিল্যার দেহ উদ্ধার হয়। তাঁকে অপহরণ করে খুন করা হয়েছে বলে অভিযোগ ওঠে। খুনের ঘটনায় বারাসত ও বিধাননগর মহকুমা আদালত থেকে আগাম জামিন পেয়েছিলেন প্রশান্ত বর্মণ। সেই আগাম জামিনের বিরোধিতা করে কলকাতা হাইকোর্টের দ্বারস্থ হয় বিধাননগর পুলিশ। আগাম জামিনের নির্দেশ খারিজ করে ২২শে ডিসেম্বরের মধ্যে তাঁকে আত্মসমর্পণ করার জন্য নির্দেশ দেয় কলকাতা হাইকোর্ট। তবে তিনি তা না করায় তাঁর বিরুদ্ধে গ্রেফতারি পরোয়ানা জারি করে বিধাননগর আদালত। ওই অবস্থাতেই সুপ্রিম কোর্টের দ্বারস্থ হন প্রশান্ত। ২৩শে জানুয়ারির মধ্যে তাঁকে আত্মসমর্পণ করার নির্দেশ দিয়েছিল বিচারপতি রাজেশ বিন্দল এবং বিচারপতি বিজয় বিষ্ণেই-এর বেঞ্চ। এরপর থেকে পুলিশের খাতায় ‘পলাতক’ ছিলেন তিনি। তবে, স্থানীয়দের দাবী, মাঝে মধ্যে কয়েকবার নিউটাউনের বাড়িতে প্রশান্তকে দেখা গেছে।

০০০০০০০০০০০০০০০০

দক্ষিণ কলকাতার বাঁশদ্রোগীর একটি বেসরকারি স্কুলে তৃতীয় শ্রেণীর এক পড়ুয়ার মৃত্যুকে কেন্দ্র করে বিক্ষোভের জেরে এলাকায় তীব্র উত্তেজনা দেখা দেয়। অভিভাবকরা শিক্ষকদের বিরুদ্ধে চরম গাফিলতির অভিযোগ এনে পথ অবরোধ করেন।

আগেই জানানো হয়েছে, ওই পড়ুয়া স্কুলে বারংবার শরীর খারাপের কথা বলা সত্ত্বেও তাকে বেঞ্চে মাথা নিচু করে বসে থাকার নির্দেশ দেওয়া হয় বলে অভিযোগ। সারাদিন এভাবেই থাকার পর ছুটির সময় ভারী ব্যাগ নিয়ে বেরোনোর সময় সিঁড়ি থেকে পড়ে যায় সে। ১০ দিন হাসপাতালে ভর্তি থাকার পর রবিবার তার মৃত্যু হয়।

নেতাজীনগর থানায় স্কুল কর্তৃপক্ষের বিরুদ্ধে লিখিত অভিযোগ দায়ের করেছে ছাত্রটির পরিবার। স্কুল কর্তৃপক্ষ অবশ্য সব অভিযোগ অস্বীকার করেছে।

এদিকে গতকালই যাদবপুরের বিধায়ক শর্বরী মুখোপাধ্যায় ওই পড়ুয়ার বাড়িতে যান তিনি। মৃত পড়ুয়ার পরিবারকে সবরকমের সাহায্যের আশ্বাস দেন।

০০০০০০০০০০০০০০০০

আজ ১১ই জ্যৈষ্ঠ। প্রেম ও বিদ্রোহের কবি কাজী নজরুল ইসলামের ১২৮-তম জন্মদিন উদযাপিত হচ্ছে যথাযোগ্য মর্যাদায়। নজরুল ইসলামের সঙ্গে কলকাতা বেতার কেন্দ্রের সম্পর্ক ছিল অতি নিবিড়। ১৯৩৮ এ তিনি হারামণি, নবরাগ মালিকা, গীতিবিচিত্রা অনুষ্ঠান পরিচালনা করেন। ১৯৪২ এর ৯ই জুলাই এই বেতার কেন্দ্রে এক অনুষ্ঠানে কবিতা পাঠ করার সময় তিনি হঠাৎ বাকরুদ্ধ হয়ে পড়েন। তাঁর কবিতা এবং গান, আজ'ও সমাজ জীবনে অত্যন্ত প্রাসঙ্গিক। উদ্বুদ্ধ করে বর্তমান প্রজন্মকে।

দিনটি উপলক্ষ্যে রাজ্য সরকারের পক্ষ থেকে'ও শ্রদ্ধাজ্ঞাপন অনুষ্ঠানের আয়োজন করা হয়েছে। হুগলী জেলার সংশোধনাগারে নজরুলের মূর্তিতে শ্রদ্ধা নিবেদন করা হয়। রাজদ্রোহের মামলায় ব্রিটিশ সরকার তাঁকে ওই জেলে বন্দী করে রেখেছিল।

তাঁর জন্ম ভিটে বর্ধমানের চুরুলিয়ার নজরুল একাডেমিতে এই উপলক্ষে দিনভর নানা অনুষ্ঠানের আয়োজন করা হয়েছে। শুরু হয়েছে পাঁচ দিনব্যাপী ৪৬তম নজরুল মেলা ও বিশেষ সাংস্কৃতিক অনুষ্ঠান। আজ সকালে চুরুলিয়ার স্থানীয় বাসিন্দা, বিভিন্ন স্কুলের পড়ুয়া এবং অগণিত নজরুলপ্রেমীদের স্বতঃস্ফূর্ত অংশগ্রহণে একটি বর্ণাঢ্য প্রভাতফেরি সমগ্র এলাকা পরিক্রমা করে। এরপর কবির জন্মভিটেয় স্মৃতিসৌধ এবং কবি-পত্নী প্রমিলা দেবীর সমাধিস্থলে পুষ্পার্ঘ্য অর্পণ করে শ্রদ্ধাজ্ঞাপন করা হয়।

বিশ্ববিদ্যালয় কর্তৃপক্ষ জানিয়েছেন, আজ বিকেল থেকেই আনুষ্ঠানিকভাবে শুরু হচ্ছে ঐতিহ্যবাহী নজরুল মেলা। আগামী ৩০শে মে (অর্থাৎ ১৫ই জ্যৈষ্ঠ) পর্যন্ত চলবে এই মেলা ও সাংস্কৃতিক অনুষ্ঠান।

০০০০০০০০০০০০০০০০

কবি কাজী নজরুল ইসলামের জন্মদিন উদযাপন উপলক্ষে আজকের প্রসঙ্গের বিষয় “চির সংগ্রামী নজরুল”। বিশিষ্ট নজরুল গবেষক ডঃ বাঁধন সেনগুপ্তর সঙ্গে কথা বলেছেন অভিজিৎ চক্রবর্তী। সংবাদ বিভাগ প্রযোজিত অনুষ্ঠানটি শোনা যাবে আজ রাত আটটায় গীতাঞ্জলি প্রচার তরঙ্গে, ডিটিএইচ বাংলা ও আকাশবানী সংবাদ কলকাতার সোশ্যাল মিডিয়া প্ল্যাটফর্মে।

০০০০০০০০০০০০০০০০

দক্ষিণবঙ্গের বিভিন্ন জেলায় আগামীকাল থেকে বৃষ্টি পরিমান বাড়বে বলে আলিপুর আবহাওয়া দপ্তর জানিয়েছে। গত ২৪ ঘন্টায় আসানসোলে সব থেকে বেশি সর্বোচ্চ তাপমাত্রা রেকর্ড করা হয়েছে আসানসোলে প্রায় ৪০ ডিগ্রি। তবে আগামীকাল থেকে তাপমাত্রা কমার সম্ভাবনা রয়েছে।

একটি প্রতিবেদন -

(ভয়েসকাস্ট - কাশফিন)

০০০০০০০০০০০০০০০০

০০০০০০০০০০০০০০০০